



Broj: 343-1/2014
Datum: 25.04.2014.

**TUŽILAŠTVO BIH
GOSPODINU GORANU SALIHOVIĆU, GLAVNOM TUŽIOCU**

SARAJEVO
Ul. Kraljice Jelene br. 88

Na osnovu člana 213. Zakona o krivičnom postupku BiH, Evropski univerzitet Brčko distrikt podnosi

KRIVIČNU PRIJAVU

protiv:

Momčila Poljića, šefa Odjeljenja za obrazovanje u Vladi Brčko distrikta,

zbog toga

što je iskoristio službeni položaj šefa Odjeljenja za obrazovanje u Vladi Brčko distrikta i nije u propisanom roku od sedam dana računajući od 27.12.2013. godine, kada je Odjeljenje primilo zahtjev za akreditaciju Evropskog univerziteta Brčko distrikt, dostavio Agenciji za razvoj visokog obrazovanja i osiguranje kvaliteta BiH prijedlog Komisije stručnjaka za akreditaciju ovog Univerziteta, što je bio dužan da učini u skladu sa članom 25 stav 1 Pravilnika o akreditaciji visokoškolskih ustanova u BiH, već je tokom mjeseca aprila 2014. godine obavijestio Agenciju da je Evropskom univerzitetu navodno istekla licenca, iako Univerzitet ima važeću licencu, te je na osnovu toga Agencija dana 25.04.2014. godine skinula Univerzitet sa info - liste licenciranih visokoškolskih ustanova u BiH, pa je tako Evropskom univerzitetu nanio veliku moralnu i materijalnu štetu, čime je izvršio krivično djelo zloupotrebe položaja ili ovlaštenja iz člana 377. stav 1 Krivičnog zakona Brčko distrikta.

Obrazloženje

Evropski univerzitet ima urednu dozvolu za rad koju je izdalo Odjeljenje za obrazovanje pod brojem predmeta UP-I-37000204/11, broj akta 0285RG-001/11 od 28.12.2011. godine, nakon što je Skupština Brčko distrikta odlukom broj 01-02-431/11 od 30.06.2011. godine usvojila odluku o opravdanosti osnivanja Evropskog univerziteta. Pošto je ovaj Univerzitet osnovan nakon stupanja na snagu Okvirnog zakona o visokom obrazovanju u BiH i Pravilnika o akreditaciji visokoškolskih ustanova u BiH, to se naša dozvola za rad - licenca smatra ex - ante akreditacijom iz člana 47 Pravilnika o akreditaciji visokoškolskih ustanova. Kako je ova akreditacija bezuslovna, to je ona, u smislu člana 48 stav 1, izdata na rok od tri godine, što znači da važi do 28.12.2014. godine. U smislu člana 48 stav 2 Pravilnika, bili smo dužni da u roku od šest mjeseci prije isteka roka naše

akreditacije podnesemo zahtjev za akreditaciju. Mi smo ovaj zahtjev podnijeli 27.12.2013. godine, što znači da smo to učinili i prije roka. U smislu člana 17 Pravilnika, akreditacija se obavlja u roku od najviše šest mjeseci od dana podnošenja zahtjeva. Učesnici u postupku akreditacije, uključujući i Odjeljenje za obrazovanje, su dužni da usklade sve aktivnosti kako bi se ispoštovao ovaj rok. Međutim, Odjeljenje nije preduzelo ništa da bi se akreditacija valjano sprovela. Povodom našeg zahtjeva Odjeljenje nas je obavijestilo aktom broj predmeta 37-001265/13, broj akta 0313SR-002/13, od 30.12.2013. godine da će razmotriti naš zahtjev za akreditaciju nakon što se okonča postupak upravnog nadzora nad našim Univerzitetom koji je bio u toku. Potom smo se pismeno obratili Odjeljenju aktom broj 223-1/2014 od 18.03.2014. godine, kojim smo urgirali da Odjeljenje riješi naš zahtjev za akreditaciju. Povodom ove urgencije Odjeljenje nam je odgovorilo aktom broj predmeta 37-001265/13, broj akta 0313SR-005/14 od 27.03.2014. godine da postupak upravnog nadzora nad Univerzitetom predstavlja prethodno pitanje u postupku akreditacije.

U smislu člana 25 stav 1 Pravilnika Odjeljenje za obrazovanje je bilo dužno da u roku od sedam dana od dana prijema zahtjeva za akreditaciju dostavi Agenciji za razvoj visokog obrazovanja i osiguranje kvaliteta BiH prijedlog Komisije stručnjaka. Međutim, Odjeljenje ovu svoju obavezu nije izvršilo. U smislu stava 3 istog člana direktor Agencije je dužan da imenuje Komisiju stručnjaka u roku od sedam dana od dana prijema prijedloga Odjeljenja. Kako šef Odjeljenja nije želio da da prijedlog za sastav Komisije, to ni direktor Agencije nije donio rješenje o imenovanju Komisije.

Tokom aprila mjeseca 2014. godine prijavljeni Momčilo Poljić je zlonamjerno, tendenciozno i netačno obavijestio Agenciju da je Evropskom univerzitetu istekla licenca, a sve u namjeri da nam nanese što veću štetu. Povodom ovog obavještenja Agencija je sa info – liste licenciranih visokoškolskih ustanova u BiH skinula Evropski univerzitet Brčko distrikt. Ovakvim postupanjem šefa Odjeljenja našem Univerzitetu nanesena je velika šteta.

Nije tačno da ovaj Univerzitet nema licencu. Univerzitet je u propisanom roku podnio zahtjev za akreditaciju, a gospodin Poljić nije želio da pokrene postupak akreditacije zloupotrebljavajući službeni položaj i obmanjujući nas dopisima u kojima je navodio da postupak akreditacije mora da zastane, dok se ne riješi upravni spor koji se vodi kod Osnovnog suda Brčko distrikta protiv njegovog rješenja o zabrani rada Univerziteta. Licenca Evropskom univerzitetu traje sve dok ne dobije rješenje po podnesenom zahtjevu za akreditaciju. Rok za rješavanje po našem zahtjevu za akreditaciju još teče.

Pošto su se u radnjama prijavljenog stekli svi elementi krivičnog djela zloupotrebe položaja ili ovlaštenja iz člana 377. stav (1) Krivičnog zakona Brčko distrikta, to predlažemo da preduzmete mjere iz vaše nadležnosti kako bi prijavljeni bio oglašen krivim i kažnjen za izvršeno krivično djelo.

PRILOG:

- 1) Kopija odluke Skupštine Brčko distrikta broj 01-02-431/11 od 30.06.2011. godine o opravdanosti osnivanja Evropskog univerziteta;
- 2) Kopija zahtjeva za izdavanje akreditacije broj 2173-2/13 od 27.12.2013. godine;
- 3) Kopija urgencije za rješavanje zahtjeva za akreditacije broj 223-1/2014 od 18.03.2014. godine;
- 4) Kopija akta Odjeljenja za obrazovanje broj predmeta 37-001265/13, broj akta 0313SR-002/13, od 30.12.2013. godine ;
- 5) Kopija akta Odjeljenja za obrazovanje broj predmeta 37-001265/13, broj akta 0313SR-005/14 od 27.03.2014. godine
- 6) Kopija info – liste licenciranih visokoškolskih ustanova u BiH na kojoj se više ne analizira Evropski univerzitet.

S poštovanjem,



REKTOR
Prof. dr. Zoran Mišošević